

[Augsburg], 21. Juli 1562

An Johannes Oporinus

UB Basel, Fr. Gr. I 11, fol. 254r.

Steinmann Nr. 745.

Lit.: Husner S. 157.

S. P. D. Crebras ad te scribenti literulas, nec vllam non modò oblatam, sed etiam speratam occasionem praetermittenti, nullae abs te, aut, si quae, non meis tamen respondentes, redduntur. Vnde suspicari mihi subit, te meas non accepisse. Verùm id, quanquam molestum, parui refert. Omnium enim summa est eadem: DD. Fuggeros probare specimen, et editionem Gregorae ad autumnum expectare: et me (si fieri possit) cupere, Epictetum meum non edi posthumum. Sin id impetrari non poterit: hunc ex eo labore fructum caepi, vt τὴν ἀποτυχίαν οὐχὶ μὲν ἀπαθῶς, ἀλλὰ μετριοπαθῶς feram. Sed si edetur me viuo Epictetus, ad 50 exempla aut 60 mitti ad me velim, quò pluribus notis et amicis gratificari possim. Qui numerus si tibi grauis est: numerabo quanti erunt libelli, quos ὑπὲρ τὸ αὐθαίρετον miseris.

Confeci his diebus Byzantinae historiae epilogum, προφητικὸν ἔργον αὐτόκλητος ἐγχειρισάμενος, odium scilicet quaeritans, τά γε βεκκεσέληνα ἐπεισκυκλήσας. Adieci Epitaphia Fuggerana, et εὐχαριστικὰ σοί τε καὶ τῷ χαρίνῳ τῷ ἡμετέρῳ. Quae an οἱ Διόσκουροι probaturi sint, nescio. Sed si non acceperis illa, per me non stetisse, quò minus ederentur, scito. Adieci etiam ἐπιτάφιον Moibani viri doctissimi, quod eius versibus quos Meo Epicteto adiecit, annexi velim. Bene vale, nosqué, si potes, exhilarato. 12 Cal[endas] Augusti 1562.

Hiero[nymus] Wolfius
Tuus.

D. Carino et Castalioni nostro P[lurimam] S[alutem] opto.